



наведи телефон

Луимә СЭрипос

21.09.2023
№ 18 (1300)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



С. Ромбандеева вӑрум хури

Ты хурит Ханты-Мансийск ӱст аквторыг хӑйтум мӑхум пӑслым блӑгыт. Сӱкыр ӑтпос 16 хӑталӑт Россия янытыл мир хӑйтсыт, ты тӑла тох намаим бӑлыс: Всероссийский день бега «Кросс Нации – 2023». Тамле пӱмыщ вӑрмаль урыл 4 лӑпсыт ловиньтӑн.

Ты номерт ловиньтӑн:	Вӑр ӱргалан хӑтпат рӱпатаныл ▶ 3	Ӱс мир хӑйтсыт ▶ 4	Йис блупса ос пӑс блум вӑрмалит ▶ 6
Нуми Тӑрум нӑвраманӑ ▶ 7	«Вогулка» нампа мӑ ▶ 12-13	Мӑньци мӑйтыт ▶ 15	Мӑньци мӑт йильпи суссылтап вӑрвес ▶ 16

Эрнэ тэла магыс сав нётмил олы

Сүкыр этпос 8 хөталэт округ кұщай нэ Наталья Комарова «Югра» телестудия-колт махум эт хөнтхатыглас ос ищхйпың ут хосыт проекттыт эт рүпитан хөтпат эт потыртас. Төва миркол кұщайт тав этэ ос тув ёхталасыт, мир пұмщалам тэлат урыл ювле потыртасыт, хұлтыгласаныл.

Округ кұщай нэ **Наталья Комарова** лавыс:

– Эрнэ проекттыт хансым өщнэ махум сүкыр этпос 30 щисла мус «Признание» нампа мән тананыл кетуңкве вёрмияныл. Тыт сав мирн ты проекттыт ищхйпың ут хосыт ловиньтавет, сунсавет ос касың хөтпа кәтпос пинуңкве вёрми. Ам округ махманув ты вәрмалыт рүпитаңкве пуссын вөвиянум.

Проекттыт эт рүпитан организацият касың тәлныл савнувег ёмтэгыт, тән акв реестрын хансавет. 2022 тәлт – 204 тамле кол олыс, ты тәл сүкыр этпос овыл щислат – 352 кол савитыг ёмтыс.

Кұщай нэ та урыл щәгтым лавыс, Россия Минэкономразвитиятэ хансум щирыл мән

округув 5 тәл сис овыл местат акваг олы.

Наталья Комарова сака ёмас ляххал грант-олныт урыл потыртас. Ты элыпал грант-олныл туп акв щёс майлувёсыт, ань ты тәлныл тох вәрвес, хұрум тәл ювле хультнэ порат тән ос йильпииг хансум проектаныл магсыл нэпакыт кетуңкве ос ты олныт виңкве тәртвёсыт. Мөлты тәл ты нётмил туп акв щёс ойтыглавес.

«Благостыня» нампа мирн нётмил вәрнэ колт кұщай нэ **Мария Тищенко** потыртас, манхурип рүпата тән вәрёгыт ос хумыс элалы рүпитаңкве патэгыт:

– Мән округувт сав нётмил вәраве, такви рүпататэ овылтан касың хөтпа тув нэпаканэ миңкве вёрмиянэ. Рүпи-



Н.В. Комарова махум эт потырты

тан колыт ань аренда магыс мощца олн ойтэгыт. Тувыл хультум олныт мән ос эрнэ тэлат рүпата-тан магыс тәстыянүв.

Мария Владимировна яныг пұмщипа Наталья Комарован ос мирн нётмил вәрнэ департаментыт кұщай нән Тереза Пономареван лавыс. Мирколныл махманув аквписыг нётает.

Округувт сүкыр этпос овыл щисла пәсыл Губернатор олн-нётмил винэ магыс касыл овылтахтас, ты нилыт конкурсын махманув эрнэ нэпаканыл вос кётыяныл. Гражданский ос социальный инициатива Фондыт рүпитан кұщай вәңын хум **Дмитрий Сафиоллин** потыртас, хотьют ань вёрми проекттыт эт рүпитаңкве:

– Мән округувт тәл сис конкурсыт нила щёс вәрыглавет. Махманув, хотьют таңхи такви тэлатэ овылтаңкве, эрнэ нэпакыт вос щёпиты ос кёты, 14 тәланыл төвлум ныврамыт ос ты грант-олн винэ магсыл нэпаканыл атуңкве вёрмияныл. Договор-нэпак мән ты хөтпа эт хансэв, олн-нётмилэ проектэ вәрнэ магсыл лицевой счётын кётылүв, ос тән рүпата-

ныл вәрнэныл юи-пәлт, отчёт-нэпаканыл ювле ищхйпың ут хосыт кётыяныл.

Олн винэ нэпакыт мән таквс этпос 2 щисла мус кетуңкве рөви. Олныл ке тәставет, тән 2024 тәлт мәнполь этпос овыл щисланыл рүпатаныл овылтыяныл ос 2024 тәлт рётың юсвой этпос 28 хөтал мус тәнки тәланыл эт рүпитаңкве патэгыт.

Махманув китыглахтасыт, тән сартын мир рүпатал минэ колныл олныл ке майлувёсыт, ётыл тәңаныл бизнес магыс нётмил виңкве рөви ман ати.

– Хоты хөтпат бизнес магыс олн-нётмилыл ойтвёсыт, рётың юсвой этпос 2023 тәлт федеральный законопроекттыт йильпи щирыл олн-нётмилылойтуңкве патвёсыт.

Махманув ты тәл 350 сөтыра солкови савит олн-нётмил виңкве вёрмёгыт, тәнки урыл ос хансум бизнес-план мән палтув вос кётэгыт, – мирн нётмил вәрнэ департаментыт рүпитан кұщай вәңын нэ **Светлана Круглова** потыртас.

Оксана АЛБИНА



«Благостыня» колт рүпитан ос тот олнэ махум

Вөр үргалан хөтпат рүпатаныл

Кәсың тәл сүкыр этпос хүрмит үшләхтын хөталэт Россия янытыл вөр үргалан хөтпат ялпың хөталаныл вәрыглаве, руц ләтңыл «День работников леса» ләваве.



Белоярский районныл блнэ хумыг

Ты тәл янытлан хөталаныл сүкыр этпос 17 щислат блыс. Ты кастыл округувт рүпитан вөр үргалан мәхум рүпатаныл урыл потыртаңкве Ханты-Мансийск үст ты этпос 14 хөталыт акванатхатыгласыт, руц ләтңыл сапрәнияныл «Югорский лесной форум» намаим блыс.

Ань недропользование департамент пәлныл 14 лесхозыт ос 24 мавит-үргалан мāt, заказникыт рүпитэгыт. Вөр ос мавит үргалан хөтпат тәнки вәрмаяныл урыл потыртаңкве ты яныг сапрәнин округ янытыл эхталасыт.

Өвлэт тән «совет лесничих» сапрәнит най харыгтан тәла урыл потыртасыт. Кәсың тҗяг ос туйсыс сәв вөр найн эсаве, мәхум блнэ мән най ул вос эхты, вөр үргалан хөтпат тҗяг кәсың пәвыл

ос үс пөхат мувлахи мә хильяныл, мән ййвыт хот-сәгрияныл. Лесхозыт рүпитан хөтпат ләвсыт, округув сака яныг, акв мāt түйт сәртын толы ос мātōсамыг емты, мөт мātяңк нәтнэ этпос оигпан порат толункве туп бвылтахты. Округ янытыл ты рүпата акв порат вәруңкве тән ат вөрмөгыт.

Сапрәнит недропользование департамент кұщай вәңын хум Егор Збродов пуңкототыс. Тав мәхум ёмашкв хұнтлысанэ ос ләвыс, ты рүпата хоты порат вәруңкве эри, тән тах номсахтэгыт.

Ос акв тәла урыл тән потыртасыт, кәсың пәвыл пөхыт порсаня блы. Ты порс акван-атнэ мāt ань «Юграэкология» намба организация нупыл хасвёсыт. Тувыл лесхозыт рүпитан хөтпат порсанят элаль уральтыяныл. Егор Михайлович ләвыс, ты



Товлыңхәпыл яласан хумыг

организацият рүпитан хөтпат тамле мāt уральтаңкве ань тәнки тах патэгыт.

Потраныл оигпан юпәлт вөр үргалан мәхум хара мән минасыт, ұльпат, нәңкыт ос мөт мән ййвыт пуссын аквээт ұнттысыт.

Округ янытыл эхталам хөтпат КВЦ «Югра-Экспо» колт тәнки янас колнакыт щәпитәлсыт, сәвсыр хурит, нәпакыт, кәтыл вәрим пормасыт суссылтасыт ос рүпатаныл урыл мирн потыртасыт.

Евгений Платонов Нижневартовский лесхозт сәв тәл рүпиты. Хум ләвыс:

– Мән кәсың тәл тыг яныг сапрәнин эхталэв. Үргалан мāv сака яныг, рүпата сәв бньщөв. Юибвил тәлыт сәв мә найн эсаве, ань вөр уральтаңкве акваг ялантэв. Тувыл лесничествав тув мус яныг, ты туй най тәнэ мән ялуңкве ат вөрмысув. Пилотыт ләвсыт, тув ялнэ ос ювле эхтын мәгсыл керосин ат товылхаты. Тамле най лап-харыгтаң-

кве сака тәрвит. Тувыл мән лесничествавт мāv вөй нөх-винэ сәв компаният рүпитэгыт, сосса щөмьят вөраим, хұл алыщлым, сәлы үрим блэгыт. Тән этаныл бс сәв рүпата бньщөв.

Белоярский районт «Нумто» мавит үргалан мāt кұщайг **Людмила Матвеева** блы. Тав ты сапрәнин бс вөвыглавес. Кұщай нэ ләвыс:

– Мән кәсың тәл вөр үргалан хөтпат янытлан хөтал кастыл тыг эхталэв. Мәхманув мавит үргалэгыт, ты тәла урыл мирн вәңкве бс эри. «Нумто» мавит ургалан мāv 26 тәл рүпиты, хөт ты үргалан мāv блы, манхурип рүпата вәрөв, төват шар ат вәгыт. Тахөтал сыс сәв ныврамыт, мәнлат хөтпат тыг эхталасыт, мәнки рүпатав урыл тәнанылн потыртасүв.

Вөр үргалан мәхум ялпың хөталаныл кастыл кәркамыг рүпитан хөтпат ты сапрәнит янытлан нәпакыл майвөсыт.

Людмила ТЕТКИНА



Нõх-патум хум хõтпат янытлавет



Округ кўшай нэ Н.В. Комарова мир ёт зарядка вәри

Ус мир хайтсыт

Сўқыр этпос 16 хõталэ́т округув янытыл 19 районытт янге-мәне хайтсыт, ты тәла тох намаим бõлыс: Всероссийский день бега «Кросс нации – 2023». Ты сака э́рнэ тәла 2004 тәл пәсныл «Спорт – норма жизни» федеральный проект щирыл кәсың тәл таквсы порат вәрыгләлаве.

Ханты-Мансийск үст мәхум А.В. Филипенко нампа спортивный центр мәт атхатыгласыт, 4 сõтыра 573 хõтпа аквторыг хайтсыт, кассыт. Овлэ́т школат ханищтахтын әгирищит ос пыгрищит хайтсыт, тувыл мәнәлат мәхум, тән юи-пәланыл нэ ос хум хõтпат кассыт. Ты юи-пәлт ущ пуссын аквторыг нёвумтасыт.

Округ кўшай нэ **Наталья Комарова** ләвыс:

– Ятил мәхумақвет, матьёмас тыг ёхтысын, хўталәлэгын, хайтыгтәгын. Сустёмт, тыг янге-мәне

атхатасыт – школат ханищтахтын няврамыт, нас ләщлакв хайтыгтан яныг-хõтпат, намың-суиң спортсменыт, щёмьяң мәхум мәнә нявраманыл ёт ёхтысыт.

Туп мән усувт нила сõтыра арыгтем хõтпат хайтәгыт, мõт районыт усаныл ос пәвланыл мәхум тыхõтал ос аквтох хайтуңкве патәгыт. Ты атхунь сака э́рнэ тәла, хõтпа вәтихал хўталәлы те, хайтыгты, пустәгыл олы, нэ́мат әгм тав палтә ат ханы.

Ханты-Мансийск үсн

Россия спорт министр вәңын хум **Алексей Морозов** ёхталас, тав тох потыртас:

– Россия янытыл рўпитан спорт тәла Министрства пәлыл нәнанн сәв ёмас ләтың ләвөгум. Тыхõтал улпыл нән усынт щар мәк сәв мәхум хайтуңкве щёпитахтасыт. Тамле ёмас мәт мир пусың номтыл ёмыгтәгыт, пуссын аквьёт зарядка вәрёв, потрамёв, мүйлэв.

Ам ань таи ләвуңкве таңхөгум, спорт тәла вәнә мәхум нупыл сунсән, хумус тән хайтыгтәгыт, ханищтахтән. Тувыл кәсың хõтал ос тох вәрён, тõнт пус кәт, пус ләгыл олуңкве патәгын, тәксарыг ёмтәгын.

Я-ты, тувыл пуссын хайтнә лёңхын та лёльсыт. Тõват кощюм пәрал олыс – сыресыр Ащирма ойкат, Түйт әгит, крокодилыт, ләңынақвет, охса-

рыт та маныр. Акв мәнәлат әги ханты супыл олыс, китыгласлум, сосса әги? Ләвыс, нас мән олупсав ханищтытә, маснутанув пўмщалыянә, таимәгыс сосса мир суп масыс.

Щёмьят мәгыс сәвсыр конкурсыт ос касылыт вәрыглавёсыт, няврамыт ёнгалтавёсыт – арбузыт мõт мән хайттысыт (хотьют сәв тоты, тав та нõх-паты), шахматыл ёнгысыт, хум хõтпат халаныл пёрщисыт. Пуссын акв канын пётхатасыт, хотьют маныр вәруңкве вёрми, хәсы, тот та касы, ёнги.

Тасәвит ощхуль олыс, пуссын ёмас номтыл, пўмщалахтым ёмыгтасыт. Тувыл нõх-патум мәхум наманыл ләввёсыт, янытлавлёсыт, мүйлупсатыл майвёсыт.

Светлана РОМБАНДЕЕВА



Мир пусмалтан тэлат 6вылтыт

Таквсы ос тэлы сыс махум пусмалтан магыс мань павлыт мус машинат яласаңкве 6ста патэгыт. Тамле латың «Центр профессиональной патологии» округ пўльницат рўпитан яныг лёккар Николай Ташланов лавыс.

Китыт тэлыг ты ёмтыс, ань лёккарыт округ янытыл махум тэлэ-тувёт уральтым рўпитэгыт. Ты накт савсыр лёккарыт тананыл тотыглан машинал элн 6лнэ павлытын минасыт.

Тан ань састум лёнхыт хосыт ват саграпнал этпос 15 щисла мус 22 савсыр павлың ман ялэгыт, тыи Нефтеюганский, Кондинский, Ханты-Мансийский ос Нижневартовский районытын. Та машинат янас колхусапыт 6ныщэгыт, тот махум ищхипың утыт хосыт х6псыяныл, сыманыл, майтаныл уральтавет, п6славет. Тувыл сыре-сыр анализыт вивет ос 6щнэ агманыл тара-паттавет. Ань павлыт халт ялантым 11 савсыр лёккарыт рўпитэгыт. Тыи терапевт, нэ х6тпат лёккар, хирург, сам лёккар, флюорография ос УЗИ вэрнэ х6тпаг ос м6т агмыт пусмалтан х6тпат. Тувыл туи сыс «Николай Пирогов» нампa нэиңхэпт рўпитан лёккарыт 6с машинал яласаңкве патсыт, тыи паль, тур ос нёл агмыт суснэ лёккар, сым ос ўлщпункыт пусмалтан лёккар.

Николай Ташланов тох лавыс:

– Ань элн 6лнэ павлытын ялантан магсыл ищхипың утыл щёпитым ат машинат рўпитэгыт. Аквта щёс махум х6псы агм тара-паттын «флюорография» колнакт уральтавет, нэ х6тпат щакваныл суснэ «мам-

мография» колнакн щалтсэгыт, тувыл лаборатория, УЗИ вэрнэ ос сым уральтан колнакыт 6лэгыт.

Тувыл туи рўпитан порат, хурум этпосыт сыс тан тыгле-тувле яласан «Николай Пирогов» нэиңхэпаныл округ янытыл 15 савсыр павлытыт пэг-пўхталас. Та щирыл лёккарыт 2 с6тыра элумх6лас пусмалтасыт, 3 с6тыра 202 х6тпат тан палтаныл ёхталасыт ос янытанылт суссаныл.

10 000 ўсыл лэглыл вос ёмыгтасыт

Касың тэл Россия янытыл 6лнэ махум тамле акция вэрнэ х6талыт кон ёмыгтаңкве кэсащэгыт. Ань «10 000 шагов к жизни» намаим российский акция сым уральтан мирхал х6тал кастыл вэраве.

– Ты тэлт тамле х6тал «Лёккар ёт ёмыгтан нак» вэруңкве таңхияныл ос таимэгыс аквьёт рўпитан махум, нас ёмыгтаңкве кэсащан х6тпат пуссын



Тамле машинал лёккарыт павлытын ялантэгыт

тув в6вавет. Акв мэт ат ўнлантан ос акваг нёвсын вэрмалъ ман 6лупсав ёмасыг вэритэ. Элумх6лас пустагыл 6лнэ вэрмале элалъ ёмщакв ке тотытэ, тав сые агмыңыг ат ёмты. Пустагыл 6лнэ вэрмалън тавён ханьщувлаңкве эри. Ты щар мак эрнэ тэла, тонт сымын пусыг паты ос сав тэл агмтэл 6лэгың, – тамле латың махум пусмалтан Лига ос сердечно-сосудистый Ассоциация колт кўщай, РАН колт рўпитан академик-хум **Лео Бокерия** лавыс.

Ань тамле вэрмалъ мань таквс этпос китыт х6талэт вэраве ос та сат х6талыт пус сымыл 6лнэ сатыг лававе тах. Ты

проект мирхал пусмалтан организацият вэрвёс, яныгмахум савнув нёвсым, матыр вэрим вос 6лнувыт ос таимэгыс х6т-ати ёмыгтан лёнхыт щёпитавет, ты коныпал элумх6лас пустагыл 6лнэ наке, руц щирыл «здоровый образ жизни» ос ГТО вэрмалит, тыи «готов к труду и обороне» тув хансавет.

Юи-6выл тэлыт сыс ты проектыт акв миллион савит х6тпа матыр вэрёгыт. Ань ты акция порат ёмыгтаңкве ке кэсащэгың, нан ты л6псыт намын хўлтуңкве вэрмильн: (<https://ligazn.ru/Reg10KSteps2023>).

Ос матыр лэххал вэңкве манос ловиньтаңкве таңхегын ке, тыт кисхатэн: <https://маршрутыздоровья.рф/>

Мир пусмалтан департаментыл кетым лэххал маньщи латўыл

Тамара МЕРОВА
хансытэ

Йис олупса ос пёс олум вәрмалит

Йис олупса ос пёс олум вәрмалит хот ул вос ёрувлавет. Мән школавт кәсың тәл нъяврамыт мәгыс тамле ханищтап вәрыглаве, руц щирыл ләваве: «Югра древняя – Многовековая».

Тыт нъяврамыт пёс мәхманув олум вәрмалы урыл потрыт хўнтлэгыт, музей пормасыт сунсыллэгыт, тәнки матыр вәруңкв ханищтахтэгыт, арталахтэгыт.

Тох ты ўщлахтын хотал вәңын хоталэт школат рупитан история урокыт ханищтан хотпат ос йис олупса вәнә пәвлың мәхум 10 классыт ханищтахтын нъяврамыт мәгыс пёс олум вәрмалит урыл пұмаш ханищтап вәрыгласыт.

Обыл занятие Валерия Николаевна Кивелева турман класс кйвырт «Мә тәлум ялпың мөйт» кина хольт суссылтастә. Хумыс экваг-ойкаг тунра щахылт олсыг, хумыс мә яныгмаңкв патыс...

Тувыл мот колнакн минаясыт, тот Татьяна Андреевна Головина аҗиришит сәс-лөмтыл хотсыстамтасанә. Сыстамтахтын вәрмалы урыл тәнанылн потыртас. Ос тувыл ущ сунсылган мәгыс пиным музей пормасыт урыл Ольга Васильевна Баранова потыртас: манхурип алщ пёс мәхманув оцсыт, манарыл

вөраясыт, хумыс ўйхул сованыл тәсласыт, манарыл сов-кот тынтласыт, манхурип сәтапыл юнхатсыт. Пәвлувт музей кол ат оныщев, туп тамле ханищтапыт вәрыглан порат ўргалым оцнә пормасанув нөх-нэгылтәлыгылянүв, тох тай акваг аквамат та хуегыт, төпмөгыт.

Анна Николаевна Алгадьева супыт урыл потыртас: хумыс мәныщи суп ос ханты суп юнтаве, манарыл хорамтаве; хумыс тәраңыг вәңкв – хот хоты суп олы. Татьяна Андреевна хуньт сака хосат олум ўитт урыл потыртас, нэлыг лэг ахвтаст суссылтас ос хумыс тавөтыл пусумлахтуңкв рөви – потыртас. Тувыл сәсныл вәрим пормасыт урыл оц потыртас: нып, пәйп, сәнхос, сәвсыр сөвтыт суссылтас. Сергей Александрович Павлов мәнь ёрнкол такви вәрыс, оц манхурип колыл пёс мәхум олсыт, ты урыл нъяврамытн потыртас.

Нъяврамыт халт аквагырищтуп олыс, Валерия Николаевна Кивелева



О.В. Баранова аҗи ханищты

таве сәңквылтапыл тәңламанкв ханищтастә.

Татьяна Александровна Михова ёнгынутыт урыл потыртас, йивөвлытыл ёнгуңкв ханищтасанә.

Тувыл нъяврамыт ханищтан хотпанылн матырәти щаквщуңкв оц ханищтавөсыт: пум квәлыг ос пум төр сагсыт, хўлп сагсыт, нәмет юнтсыт, сәңквылтапыл сәңквылтаңкв арталахтасыт, мөйттыт хўнтласыт.

Пәвлың ўльпа щахыл овылтмәколёрытөлэгыт, мәвөңханыл иң хашхатэгыт. Тув оц тотыглавөсыт. Тот хуньтсака хосат йис мәхум мәколлы олсыт. Тувыл нъяврамыт я вәтан ялсыт, Тәгт вәтат ўнлахөлсыт, потрамасыт. Тахольтыл тән мәгсаныл такем ёмас, мәлтып, хоталың хотал олыс. Нъяврамытн тамле ханищтап вәрмалы пуссын мұстыс.

Ущты хансум потрум ләвнә щирыл, нъяврамыт сәв пёс вәрмалы ханищтасыт ос пёс мөйттыт, йис потрыт хўнтласыт. Аква йис потырт тамле олыс:

Сәт пұтсов

Пёс порат щөлың хум мәхум Төрүм-кант йирхатуңкв щөпитахтамыт. Хансаң лув йирхатнә канын тотмыт. Аква сава-лап пыгрищ тән ётаныл

минуңкв аstum. Щөлың хумит ёт ат винөныл таве. Та мувиньтанөныл тавөтыл, хот туйнөныл. Тән ляпанылн ёхты – ювле туясанөныл, тўщталахтым та поваранэтэ пыгрищ.

– Наң мән ётув ке минэгың, Нуми Төрүм мән палтув ат ёхты, пұрлахтын рөгув вуньщалыг мины.

Пыгрищ нөх-лөлюм, номсахты. Юв алум, мәнь пұтсов тотам, вөр вәтат тўйт пасан вәрум. Тувыл та пұтсовөтыл сәт щөс вит пәйтум. Сәт щөс та пұтсовө тўйт пасанән ўнта-ламтә, пұрлахтын хольтыл сәт щөс пұрламтә. Нуми Төрүм Яген рөйе вос ёхты, вос хулаве, вос вәве. Сәт щөс пұтсоврище аращин тагаталамтә, сәт щөс тўйт пасанн ўнтталамтә, тувыл витә хот-сөснэтә, ос йильпииг тагатамтә. Нәматыр ат оныщи – тох та пұрлахты. Нуми Төрүмн, сөль, пыгрищ хўлыме, кәсалыме, тав вит пұтсовөв сәгамалам.

Щөлың хум мәхум хансаң лув йирыг тўщталамыт кос, Нуми Төрүм Яганыл тән пасанылн ат ёхталам. Ётыл та хумит хоса нот ат олмыт, пуссын әтимыг ёмтыт. Пыгрищ хоса нот олум.



Я вәтат ўнлахөлэгыт

Анна АЛГАДЬЕВА

www.khanty-yasang.ru

Нуми Төрүм Нявраманэ

Ас-угорский театрыт рүпитан мэхум мәнъщи суссылтап вәрсыт, таве «Дети неба» («Нуми Төрүм нявраманэ») намтсаныл. Ты пёс йис мәнъщи мөйт-потыр щирыл Нуми Төрүм хумус такви нявраманэ мән ёл-тартсанэ. Та порат мӓ шар иң ӓтим ӓлыс, туп мувлахи акваг вит, яныг щӓрыщ хумплыс.

«Нуми Төрүм нявраманэ» спектакль суссылтаңкве патвес, ӓвыл хӓталт сӓв няврамыт оманыл ёт ос ханищтан нӓт ёт тув ёхталасыт. Сцена пӓнтсыл аквтуп ёрнколн мӓхум щалтӓгыт, колкан тармыл кӓминьт ӓнлын утытын манос талква уласытын ӓнтӓгыт. Титартистыг – мӓйтнӓ хум Вадим Важенин ос тав ӓкватӓ ёнги Юлия Яркина, тӓркур пӓхат ӓнлахӓлӓг. Хум кӓр пӓлтытӓ, кӓр вӓтат ӓнлахӓлым мӓйтӓ та ӓвылтытӓ. ӓкватӓ ӓргашцы, ты мус щаквщи.

Ёрнкол ӓвлат халт яңк тӓрпӓлыт тагатым ӓлӓгыт, тот мӓйт щирыл сӓвсыр хурит суссылтавет ос ёрнкол коныпалтсыресыр суит суйтӓгыт. Хумус вӓт тӓкыщ вӓты, хумус яңк саквыт хорстӓгыт, пуссын аквтуп тыт ты суйты.

Пёс йис потыр щирыл мӓнъщит сӓт лӓлит тӓрум ӓнъщӓгыт, мӓн ӓлнӓ мӓв котилыт ӓлы, нӓнхаль Нуми Тӓрум, Карыс Тӓрум, Опыль Тӓрум. Мӓв ёлы-пӓлт Ёлы Тӓрум, тот ӓс хӓрум лӓлитыг ловиньтаве. Ты хотталы щалтнӓ ӓлумхӓлас та мирытн виве.

Спектакль сака ёмас щирыл вӓрим ӓлы, мӓн няврамыт вос торгамтыяныл, вос вӓганыл, хумус мӓнъщи мир ӓлупсаныл ӓвылтахтас. Нуми Тӓрум ӓкватӓнтыл ӓлӓг, тӓн ат пыг ос аква ӓги ӓнъщӓг. Пыгыт ӓлыманыл ӓсыгхатӓгыт, тӓн матыр-ӓти пуссын ӓщаныл тӓл вӓрмӓгыт, хӓсӓгыт, таимӓгсыл нӓматарыл ат пилӓгыт. Ёлаль сунсӓгыт, нӓматыр пилыщмӓныг тӓнанылн ат ӓлы. Тӓрум ӓщаныл кантмаявес, тӓнаныл ӓпал ёл-тартсанӓ, тот ӓлн



Юлия Яркина ос Вадим Важенин мӓйтӓг



Няврамыт ӓпал ёл-тӓратавет

ӓлуңкве вос ханищтахтӓгыт. Ёл-тӓртыманыл тӓн кӓсаласаныл, насати мувлахи акваг вит, мӓлӓмт шар ӓтим. Мӓнъ пыг, тав наме Тӓк-Ойка охсарыг вӓрапахтас ос лӓи вӓт вӓвуңкве патыс. Лӓи вӓтыг ёмтыс, ащирмаг патыс, вит осӓ яңкыл пӓльвес, та яңк хосыт пыгыт ос ӓги мӓ тармыл лӓкква та минигласыт, хотьют хӓт ӓлуңкве патыс. Тох ӓлым, мӓ шар нас тыглӓ-тувле хосыгхаты, аквтуп яңкылма хурипа, мӓ сурмыг вос ёмтыс, тӓнт Нӓр-Ойка такви ӓнтапе мӓ тармыл вущкастӓ, яныг суил курыстым нӓрыт та нӓглысыт, ань Уралыг лӓвавет. Тох мӓ сурмыг ёмтыс, тӓн ёмщакв ёмыгтаңкве патсыт.

Ты Нӓй-ӓтырыт ӓлнӓ коныпал Нуми Тӓрум нас ӓлумхӓлас вӓрыс, тох

хӓтпа ӓлнӓ нотӓ та ӓвылтахтас. Ты спектакль ань ӓс ӓлаль суссылтаңкве патвес, хотьют ат сунсыс, ялӓн, сунсӓн, артистыт сака ёмщакв ёнӓгыт. Мӓнъщи ос ханты хӓтпа-нхв тулыглахтуңкве сака хӓснӓныл. Вадим Важенин мӓйт мӓйтнӓтӓ порат койп рӓтыглы, тувыл сӓнквылтап кӓтын вуйлы, сӓнквылты, Юлия Яркина нӓтнӓ турсуил мӓнъщи ӓргыт ӓрги, сӓнквылтапыл ӓс нӓглапӓлӓгыт, потыртӓгыт, йиквӓгыт, ӓргӓгыт.

Ты суссылтап режиссӓрыг Вячеслав Игнатов ос Мария Литвинова щӓпитастӓн, хурит Павел Мизев пӓслыс, ты коныпал сӓв мӓхум мӓт рӓпата ӓс вӓрсыт.

Галина КОНДИНА



Ам тыг ёхтумум маҗсыл номтум татем ёмасыг олы

Ольга Андреевна Ванюта ёт ам няврамыт ўщлахтын «Мәнь Ёсквет» хөнтхатыгласум, тав ётэ тот потрамасум. Няврамыт ўщлахтын ма Ясунт павылт олы, тот тит яҗ Мәнья ос Хулга акван-патёг, тувыл ёлалы Сакв я овты.

Мәньщи щирыл Хулга я ос Сакв яҗ лававе. Ольга Ванюта ёт мён тав рўтанэ ос олупсатэ урыл потыртасмён. Ам овлёт омаге-әтяге урыл титыгласлум, тав тох потыртас:

– Ам Сўқырья павылт самын патсум ос тот яныгмасум. Омам Анна Степановна Кустышева, әтям Андрей Степанович Ванюта олсыг, тән ань сас әтимыг. Мән лов няврам Ефим, Люда, Зоя, Ага, Миша, Лена, Вася, Надя, Саша ос ам самын патсўв, това қаңқанум-увщиянум холасыт. Омагум-әтягум акваг Сўқырьят олсыг, мән тот яныгмасўв. Омам сәлың махум щёмьяныл олсы, тән нёрт сәлыяныл ёт яласасыт. Тав 3 классыт ханищтахтамёт тән нәлув олмыгтасыт, тонт анёкв ам агмыл ёмтыс, павлын вәнтлысыт.

Әтяв олме нотэ палы-

тыл акваг хўл алыщлым, вбраим совхозт рўпитас. Тав ёрн хум олсы, омав саран нэ. Омагум-әтягум саран ос мәньщи ләтңыл ёмщакв потыртасыг, ханты ләтың ос торгамтасыг. Пёс порат пуссын тох потыртасыт, руц ләтңыл потыртаңкве мёрсың хөтпат хәссыт, таимәгсыл сәв ләтңыл халаныл потыртасыт.

– **Ольга Андреевна, наң школа хөт әстласын, маныр вәрнэ хөтпаг ханищтахтасын?**

– Ам Саранпавылт школа әстласум ос Ягрим павылн ёлалы ханищтахтуңкве минасум, тот маснут юнтнэ хөтпаг ханищтахтасум. Ос ётыл 2004 тәлт социальный педагогы рўпитан хөтпаг ханищтахтуңкве ялсум. Ойкам ёт Ягрим павылт акваг-хөнтхатсумён, тот вәйхатуңкве патсумён, тав наме Дмитрий Исаев.



О.А. Ванюта

Тав Брянский область-ныл олы. Мён Ягрим олнэмён порат Лера агимён самын патыс, тувыл мён Саранпавылн вәнтлысамён ос тав тыт школат информатика урокн няврамыт ханищтасанэ. Ярослав пыгмён тыт Саранпавылт самын патыс.

– **Наң ань «Мәнь Ёсквен» ёхтысын, ты ёлы-пал тыг ёхталасын? Щёмьяныл хотыютын щар сартын тыг ёхталаңкве патыс?**

– Агим тав хунь 11 тәлэ олсы, румәгитән Ясунтын вөввес, тавён тыт сака ёмас олсы, няврамыт ёт ёнгасас, матыр-әти вәруңкве ханищтавет, таимәгсыл тав тувыл кәсың туи тыг ялантаңкве патыс. Тыгыл сысы минуңкве ат таңхыс. Ярославум хўрмит тәл тыг ос акваг ёхталы. Щар сартын қаңкум пыге Слава Ванюта тав «Мәнь Ёсквен» ялантаңкве патыс, тав потранэ хўнтлым ман пуссын тыг тахмаясўв. Ойкам ос тыг ёхталаңкве патыс, няврамыт сәвсыр тәнүт вәруңкве ханищтыянэ, яныгщ нянь тәнти тәлыг-

тәгыт ос мәньщи кўрт вәрёгыт. Хулың нянь ос вәруңкве хәсёгыт. Димам ань пәвлүв клуб-колт рўпиты, школаныл пөхан минас.

Ам няврамагум мәнь порат тәнәтән янмалтасум, тувыл Сўқырьят няврамыт ёт рўпитан хөтпа тисвес, ам тув рўпитаңкве патхатасум ос ань тыг мус тот 13 тәл рўпитёгум. Амти рўпатам сака ёруптылум, мәнь няврамыт ёт рўпитаңкве пұмыщ.

– **Наң саран ләтңын вәглын? Потыртаңкве вёрмёгын?**

– Амти саран ләтңум-тыл ам ёмщакв потыртёгум, тавётыл мән мәнь тәгыл омагум-әтягум ёт потыртасўв, ань хунь акваг-атхатёв, мәнти халувт потыртёв. Яныгнүв няврамыт щән ләтңув ос вәганыл, туп мәньнүв няврамыт тән ат потыртёгыт. Школат коми ләтңыл няврамыт ханищтавет кос, ос тав әти мән ләтңув хурипагнүв олы. Това ләтңыт щар ат торгамтатёгыт.

– **Наң ты ёлы-пал манрыг «Мәнь Ёсквен»**



Я. Исаев, Р. Семьяшкин



Я. Исаев нянь вәрнэ кӯр пәлтыгы



О.А. Ванюта Ярослав пыге җт

ат җхталасын, ат тахсын манос матыр мәгсыл ат алымасын?

– Ам номсасум кос, ос нъяврамагум аквосытыл лавыгласыг: «Ома, наң юн җлән». Ам ос амти номсасум, тыт улпыл сака сав лёмвой ос мәнуй җлы, пулиг-пуравем.

– Ольга Андреевна, наң җйкан саран ләтың торгамты манос эрың потыртанҗке вәрми?

– Җйкам тай саран ләтың җмщакв торгамты, җвле матыр лавуңке җс вәрми. Тав төва мәнщи ләтңыт вәг, тыг җхталәлы, мәнщи ләтың ханищты. Амтыг җинэм элы-пәлт юн җс ханищтавәсум хумус мәнщи ләтңыл «пүмащипа» ос мот ләтңыт лавуңке эри. Ос ты коньпал ләвсыт: «Наң ул

пилән, маныр эри лавуңке, наң тах тот ханищтавен». Тыт насати щар мот щирыл мәхум ос нъяврамыт җлэгыт, щар аквтуп пуссың акв щёмья, халанылт нётхатэгыт, матыр-ати аквёт вәрэгыт, җнгасэгыт.

Ам ань номсахтэгум, мән яныгмамув порат манрыг тамле «Мән Җскве» атим олыс, ам җс тох җлуңке сака таңхегум, җс акваг тыт җлнувум, нъяврамыт җт хәйтыгтанувум, тох яныгмаңке сака җмас җлнэтэ.

Амти җс мән пәвылт яныгмасум, тот мәнщит ос сараныт җлсыт, мән халувт пуссын вәйхатсүв, акван-нётхатым яныгмасүв, пуссын лув-мис җщсыт, рупитасыт, хул алыщласыт, амти яныг-

мам порам акваг җмас номтыл кәстыгылым.

– Тыт «Мән Җсквет» җлнэ сыс маныр вәруңке ханыщувласын?

– Ам яныгыщ сәсныл сөвт, сән, җнгасан мән җпа юнтуңке ханищтавәсум. Тыимәгсыл ам номтум татем җмас, хунь сәсныл матыр юнтуңке җвылтахтэгыт, ты рупата җл-пөилттанҗке ат эри, атиңк сәс молях тувтөсы, саквалаңке манос хот-поклуңке паты. Ам таимәгсыл сөвтум молях җстласлум. Тувыл сән юнтнэ мәгсыл састум сәс пәриясум, хот-халюптаслум, җиныслум. Сәсныл матыр юнтуңке сака җмас җлнэтэ, савсыр эрнэ пормас рөви вәрапаңке, матеҗмас тыг җхтысум, ханищтан хөтпатын ам

яныг пүмащипа ләвегум, тахольт ты вәрмал җлал җотыяныл, тәнанылн пустагыл җлнэ ләтың ләвегум.

Ос «Мән Җскве» кӯщай нән Любовь Павловна Стаканован яныг пүмащипа ләвегум, тав тысәвит тал сыс сав нъяврамытын җлал җлнэ җмас номт хултыс.

Ольга Андреевна пыге Ярослав ань ты накт «МедиаШкола» форумт ханищтахтас, тот ань җист хумус ләххалыт хансуңке, хумус хурит пөслуңке, мән тинат вәруңке – тән ханищтавәсыт. Ярослав школат ханищтахтынэтэ порат Саран пәвыл музейн яланты, тот «Исторический клуб» нъяврамыт җт пәвлың мир урыл потрыт хансэгыт. Яныгпәла экват пәс җис җлупса урылтитыгыляныл, манхурип организацият пәвылт җлсыт, хөт мәхум рупитасыт – та урыл потыр атэгыт, җс сав җмас, эрнэ тәлат әгирищит-пыгирищит вәрэгыт.

Ам ты Ванюта-Исаев колтәгылн пустагыл җлнэ ләтың тәтэгум, нәг-хумыг нъяврамагән кәркамыг җлуңке ханищтасагән.

Ос аквтох җлал җуртыңыщ вос җлэгыт.



Мән җпат ос саныт



Җрнколт сәс пормасаныл суссылтэгыт

Галина КОНДИНА

Мот хон мань маньлат хотпат маньхапыл щэгтым кассыт

Туи Ханты-Мансийск үс ляпат блнэ Шапша павылт маньхапыл яласан касыл вэрыглавес. Та порат округ сосса махум халт элы хон мань эхталам нэ ос хум хотпат кассыт, пуссын акваёт 250 арыгтем элумхблас маньхапыл яласасыт.

Светлана Мултанова хапыл аквторыг нэвумтам нэт халт нох-патыс. Тав Сургутский район Русскинской павылтханты колтагылт самын патыс. Маньхапыл тамле мат ань хурмит тал ты касыс. Тав яныгмам матэт, лави, сосса махманыл танти халанылтос касыглалэгыт. Тыт ос сака сав мир, товат мот хон мань эхтысыт, таимэгыс товункве мощ тарвитыңуве.

Светлана китыгласлум, маньхапыл яласаңкве хот ханищтахтас? Тав ювле лавыс: «Ам маньтагыл товункве хасэгум, омагумн-агягумн ханищтавэсум. Павлың-вэрың мат блэв, маньхапыл яласаңкве пуссын хасэв, ватихал товыглалэв, яласэв. Таимэгыс каснэ хотал кастыл сака ат щэпитатэв. Ам ань нэт халт овлэт эхтыгпасум, ты магыс номтум емас».

Терентий Итыков ос ханты пыгрищ, 16 тале товлыс, Сургутский районныл эхталас. Тав 14-17 тал яныт няврамыт халт бвыл места вис. Пыг тох лавыс: «Тамле яныг касылт маньхапыл ам китыт щес ты яласэгум. Тупыл товункве тарвитың ати, тамле хапыл маньтагыл яласэгум. Агиришит-пыгришит эт маньхапыл акваг яласэв, тыгле-тувле товыгтэв, ханищтахтэв. Омам ос атям маньхапыл яласаңкве ос атхунь хасэг, пэс йис блупса элалэ тотытэн. Атям наме Антон Терентьевич, хапыт ос сунитвэри. Омам Клавдия Григорьевна пэс щирыл маснут юнты».

Элы хон мань блум маньлат махум

Акв маньлат аги Россиян Африка мат блнэ Замбия мань эхтыс, наме **Мервис Мариам**. Ханты-



Мансийск үст Югорский государственный университетт 3 курсыт экология тэлан ханищтахты. Аги руц латың татем емцакв вагтэ, тох лавыс: «Ам Русака үст самын патсум, тот школа асласум. Мот хон мат ханищтахтункве сака тахсум, хунь яныгмасум, Россиян йиңкве номылматсум. Тыт блуңкве анузн мусты, руц латңыл потыртаңкве ханищтахтасум. Ханты-Мансийск үст емас, сымың махум блэгыт. Тыт ань маньхапыл китыт щес касуңкве ты патэгум, молты порат китыт места висум».

Каснэ ман Мервис Мариам хурум юртагянэ эхталасыт, тан ос Зам-

бияныл блэгыт, Москва үс университетт ханищтахтэгыт, руц латңыл емцакв потыртэгыт. Агит щэгтым лавсыт, молты тыг ос эхталамыт, сосса махманув халт кассыт. Ань ос хоталпалыт я ватат блсыт, маньхапыл каснэ махум нупыл суссыт, танти ос кассыт. Ты магыс номтаныл сака емас. Тувыл ёрнколт нярнёвыль, нярхул ос мот хащтал тэнут тэсыт. Мот мирыт блупса касалаңкве тананылн пумыщ.

Акв хурит ос хурум маньлат хум лүлэгыт, тан ос Африканыл блэгыт, Москва үс университетт туризм тэла ханищтэгыт. Ман округувн мүйлуң-



Мартин, Тоби, Теми



Светлана Мултанова



Терентий Итыков



Мервис Мариам



Бурак



Ховеймин Хи

кве-касункве вӱввӱсыт. **Мартин** Камерунт самын патыс. Хум щӱнь лӱтын урыл китыгласлум, Африканылт тӱнти лӱтӱыл улпыл потыртӱгыт? Тав лӱвыс: «Камерунт 326 щӱнь лӱтын ӱлы. Омам такви лӱтӱе – баса, ӱтям – итун. Ам мӱнь порат хӱлыгласлум, тӱн халӱнт щӱнь лӱтӱыл потыртасӱг. Ос мӱн ань пуссын французский манос английский лӱтӱыл потыртӱв, ӱлнӱ мӱв Франция нупыл тӱлым ӱлы. ӱлнаӱ мӱхманув немецкий лӱтӱыл потыртасыт, тӱнт немецкий колония ӱлыс. Тувыл хӱнтлын нак порат французит ос англичаныт нӱхпатсыт, мӱв мирыӱ тӱгыл тӱн нупланыл та патыс, тӱн лӱтӱыл потыртаӱкве, лӱтӱаныл ханищтаӱкве ӱрвӱгыл лӱввесӱв.

Ань Камерун мӱвт тӱн лӱтӱаныл мӱкыг та ӱлы, мӱн щӱнь лӱтӱанув суйтӱгыт ман ӱти, кӱщайтн тувле нупыл тӱла ӱтим. Мӱхманув щӱнь лӱтӱыл мӱрсыӱ порат потыртӱлӱгыт, янгыщ яныгхӱтпат. Мӱньлат хӱтпат ос нӱврамыт пуссын мӱт хӱн лӱтӱыл потыртӱгыт, номсӱгум, мӱнти лӱтӱанув тах лӱщал-лӱщал та сӱймӱгыт.

Тоби ос Теми Нигерияныл ӱлӱг. Тоби сака потрыӱ, тох лӱвыс: «Ам ос юртанум Москва ӱс университетт ханищтахтӱв. Ханты-Мансийск ӱсн мӱлхӱтал товлыӱхӱпыл ӱхтысӱв. ӱтипӱлаг ӱсхулыт хосыт ӱмыгтасӱв, ӱсканын ялсӱв, сака нӱтнӱ мӱкве. Мӱлхӱтал ты ят ам мӱньхӱпыл яласаӱкве ханищтахтасум. Тӱпыл

товуӱкве насати сака тӱрвитуӱ, ос ам мӱньхӱпыл тох иӱ та яласасум, ханищтахтасум. Тувыл товуӱкве мощ хӱсункве патсум, лӱщмысум, щӱгтсум. Тыхӱтал сосса хӱтпат халт касункве патӱгум, номсӱгум, ӱвыл мӱста ат те выгум, сака ти хӱпум ӱри ул вос ӱӱхыгпи. Африкат хӱпыт шар мӱт хурипат, ӱлупсав ӱс янас – мӱнти Нӱй-ӱтырыт ос ялпыӱхӱталыт ӱньщӱв, мӱнти щирыл пӱйкщӱв, мӱйлӱв. Матьӱмас нӱн миркол кӱщаянын тамле ӱрнӱ касылыт вӱрыглӱлӱгыт, мӱнаван, ӱлы хӱн мӱныл ӱхталам хӱтпатн, пӱмыщ. Мӱн сунсӱв, тыт ӱлнӱ сосса мӱхум хумус касӱгыт. Сака тӱксар ӱлумхӱласаквет, молях товуӱкве хӱсӱгыт, нӱвраманыл мӱньхӱпыл мӱньтӱгыл яласӱгыт. Ты мӱгыс Югра мӱн пӱмащипа лӱтын лӱвӱгум!».

Бурак Турцияныл ӱлы, ань Москва ӱст спорт университетт ханищтахты. Мӱньлат хум лӱвыс, Россия янытыл сӱв мӱт ӱлыс, сӱвсыр мирыт культурат вӱщинтас. Хунь тыг вӱввес, тӱра кӱсасас. Мӱн мӱвт хӱнты ос мӱньщи мӱхум кӱсалас, сунсы, хумус мӱхманув мӱньхӱпыл яласӱгыт.

Нила хум ос Индияныл ӱлӱгыт, наманыл **Лолит**,

Кабо, Ангит ос Картеги. Тӱн Сургут ӱст медицинский университетт 3 курсыт ханищтахтӱгыт. Ханты-Мансийск ӱсн ӱвыл щӱс ӱхтысыт. Лӱвӱгыт, ӱвыл курс ищхӱпыӱ ут хосыт ханищтахтасыт, тувыл руш лӱтын ханищтасыт. Хунь Россиян ӱхтысыт, тӱра китыт курсын вуйвӱсыт. Тыт ӱлуӱкве ос ханищтахтуӱкве тӱнанылн мӱсты, ос таи тӱрвитуӱ – тӱлы порат сака ащирман, пӱлявет.

Акв хум Китайныл ӱлы, наме **Ховеймин Хи**. Тав ӱтӱ ӱс потрамасӱв, китыгласлӱв, мӱньхӱпыл хуньт яласӱлыс? Ховеймин Хи лӱвыс: «Ам Москва ӱст аспирантурат ханищтахтӱгум. Матьӱмас ты ялпыӱхӱталын ӱхтысум. Тамле хӱпыл нӱмхуньт ат яласасум, товуӱкве ат ханищтахтӱлсум. Тыт шар ӱвыл щӱс хӱпын тӱлсум, ань вӱглум, хумус яласаӱкве ӱри. Ханты-Мансийск – сака нӱтнӱ ӱскве, тасӱвит йив яныгми, лылыӱепа сыстам. Тыт ӱмас, сымыӱ мӱхум ӱлӱгыт. Ханты ос мӱньщи мӱхум ӱт вӱйхатасум, пуссын пустаӱгыл вос ӱлӱгыт, вос щунӱгыт!»

Касум хӱтпат ӱт

Светлана РОМБАНДЕЕВА
потыртас



Кабо, Ангит, Картеги, Лолит

«Вогулка» нампа мĀ

Ты тĀл вѳртур этпост ХĀльўс районт ѳлнэ «Вогулка» нампа мĀ-вит ўргалан заказник 30 тĀлэ тѳвлыс. Кўщаиг тот Игорьь Первов рўпиты, ты элы-пĀлт 2011 тĀл мус тав атятэ Александр Первов пуңктотыс.

МансĀвит элумхѳлас ань тот рўпитэгыт, манхурип вѳруит та мĀт ѳлэгыт ос сĀв мѳт тĀлат урыл Игорьь Александрович мĀньщи газетав мĀгсыл потыртас.

– МĀ-вит ос тыт ѳлнэ вѳруит ўргалаңкве – тыи щар мĀк яныг рўпатав. «Вогулка» нампа мĀ 1993 тĀлныл вѳртур этпос 9 хѳталныл рўпитаңкве ѳвылтахтас. 2002 тĀлт «Объединённая дирекция особо охраняемых природных территорий» нупыл хасвес. Ань «Вогулка», «Унторский», «Сургутский», «Берёзовский» ос округ янытыл ѳлнэ сĀв мѳт ўргалан мĀт тув ловиньтавет.

Учѳный хѳтпат мĀ-витув ханищтаңкве акваг тыг ѳхталэгыт. МĀн ѳтув Нижневартовск, Сургут, Тюмень ўс университетыт рўпитэгыт, ѳс мĀ-витув, тыт ѳлнэ вѳруит ханищтэгыт, ты урыл потрыт хансэгыт, нĀпакыт тĀратэгыт.

Заказникыт мĀн хѳт элумхѳлас рўпитэв. Инспектор-хѳтпаг кит сĀт вѳрт ѳлэг, тувыл мѳт кит хѳтпаг мĀ-вит ўргалаңкве минэг, тох пѳнтхатым рўпитэгыт. МĀхум тыт ул вос вѳраясыт, хўл ул вос алыщласыт, полицият, Ростехнадзорыт рўпитан хѳтпат мĀн инспекторанув ѳт тот ѳс яласэгыт, ўргалан мĀв уральтэгыт.

ХĀльўсныл заказник мус 35 вѳрыста, туй хĀпыл тув минэв. ѳвлѳт вѳруит, товлыңуйт щар ат нĀңкѳгыт, заказник мус туп ѳхтэв, тĀра та кĀсалэв – тыт сѳруп нĀлми вĀтан ѳхталас, тот товлыңуйт пити вĀрсыт, та мĀт сѳвыр хĀйтыс. Инспекторыт яныг рўпата вĀрѳгыт, таимĀгсыл вѳруит акваг ты мĀт сĀвмѳгыт. Тувыл тѳва мĀхум щар ат торгамтэгыт, вѳраяңкве тыг вѳратэгыт, тѳват тай лĀвтэгыт, алаты алхатэгыт.

– **Манхурип вѳруит, товлыңуйт «Вогулкат» ань ѳлэгыт?**

– Ты мĀт юсвоит ѳлэ-



МĀ-вит ўргалан хумыт

гыт, рущ лĀтңыл «орлан белохвост» лĀвавет. Ты товлыңуйт «Выгыр нĀпакн» хансым ѳлэгыт. ТĀнаныл акваг ўргалыянув, хоты мĀт пити вĀрсыт, мансĀвит мўңи тув пинсыт, пуссын нĀпакын хансэв. Тўяг лунтыт тыг ѳхталэгыт, рущ щирыл «гусь гуменник» лĀвавет. Ты товлыңуй ань ѳс сака мощща.

СĀлыт акваг ловиньтыянув, тĀн ѳс «Выгыр нĀпакн» хасвѳсыт. Мѳлты тĀл Ямал мĀныл 700 арыгкем сĀлыт тыг ѳхталасыт. Тонт Ямалт сака сĀв туйт патыс, тувыл мĀлтыпыг ѳмтыс ос раквыс. Ётыл илтторыг ащирмаг ѳмтыс, тох яныг пѳль вĀрыс. СĀ-

лыт тѳп хилуңкве ат вѳрмысыт, тыг ѳхтысыт. Тыт сĀлытѳпың мĀ мощща, тĀн ййвыт нюсыт пуссын ювтѳсаныл. МĀлтыпыгѳмтыс, ювле миначыт, та пĀсныл воссыг ат ѳхталасыт.

«Вогулка» мĀт сĀлыт кит пўң аня акваг ѳлѳг. Тыт ѳлнэ сĀлыянув мĀн тай ѳмашакв вĀганўв. Тулмахыт тĀн пѳханылт акваг ѳлэгыт, тѳва порат ѳс вĀщиньтыянув. Сѳрпыт тыт хĀйтыгтэгыт, аңквыт ўнттэгыт ос нĀпаныл ѳт тыт ѳлэгыт. Ты янгуйт солвал сака нѳлантэгыт, мĀн солвал хурат пĀртныл тĀн мĀгсыланыл вĀрѳв.

Нѳхсыт, норкат, сѳврыт ловиньтыянув, юи-ѳвыл тĀлыт сѳврыт мощ сĀв-



А. Первов кѳтум хуриг



Пупапщикве хансат сунсыгылы



Пёс павылн ялум мэхум

мысыт. Лов тал сыс щар атващиньтасанүв, ты тал ушта кәсаласанүв. Акв тал ты мат өлнэ сөврыт туляремия агмыл ёмтсыт, щар пуссын үссыт. Тамле агмыл мĀ порсыт, сөврыт, норкат, онтĀтрат хĀхтуңкве вёрмавет. ОнтĀтра ты мус сака мощща.

Вёртөлнут акв порат өс сака сĀв блыс. Кит тал ювле хультум порат сĀв вёртөлнутыт тэтĀл үссыт. Ань мощща кос, тувыл, тўяг тыт сөрпыт, сĀлыт, аңквыт нĀпың тĀгыл сака нĀвлалыяныл, порслыяныл.

Тўяг мĀн ўми пĕнтсыл вĀрум хусапанув хотсакватыяныл. Тув пиным мўнит юв вĀтыяныл, товлыңуит мĀгсыл вĀрум хусапанув карс ййвын вĀриянув, тĀн нōх-хĀңхĕгыт, мўнит ёл-паттыяныл. Тышир лўбль вĀрĕгыт.

МĀн ты дуплянкат акваг уральтыянув, товлыңуит мансĀвит мўни пинсыт, ловиньтыянув. Акв порат пўмащ блыс, нĕхс тув олмыгтас. Тох тай ты ўит сосыг вĀтат, ёлпатум ййвыт халт вōңха хилĕгыт.

ХĀйнут акв тĀлт өс сĀв блыс, тувыл илтторыг хотталь пуссын миныгласыт. Тōва порат тĀра

миннэ хĀйтнутыт вĀщиньтыянув, тох тĀн тыт ат олĕгыт. Ты тал мансын сĀв блыс, тох сĀв товлыңуит ат тал сыс ёмталы. ТĀн өс Ямалныл тыг ёхталĕгыт.

– **Ань заказникыт хōт хōтпа рўпитĕгыт, тĀн халанылт мĀнылат мэхум олĕгыт?**

– Рўпитан хōтпанум пенсиян патхатнэ тĀл янытыг пуссын ты ёмтĕгыт. МĀн эрнэ рўпата вĀрĕв, тувыл мэхум тыт рўпитаңкве щар ат кĀсащĕгыт. Инспектор-хōтпат сĀв нĕпакыт хансĕгыт. Ань тĀн протокол-нĕпак хансуңкве лĀвавет, тымĀгсыл сĀвсыр сĀкконыт вĀңкве өс эри. Вōрт акваг яласаңкве, вōруит ловиньтаңкве, рўпата сака сĀв, олныл мощщал ойтавĕв, кĀсащан хōтпа ань таимĀгсыл щар Āтим. Кўщайтн ты урыл акваг кос потыртĕв, тĀн ты тĀрвитың вĀрмаль ёмашакв вĀганыл, тувыл олнанув нōх ат нĕтавет.

– **ХĀпыт, моторхĀп, мĀшинат, «Бураныт» ос мōт эрнэ утыт пуссын бōныщĕгыт?**

– Эрнэ техника пуссын кос бōныщĕв. Тувыл мĀхманув акваг вōрт яласĕгыт, мотор, «Бураныт» өс пĕсыг ёмтĕгыт, вĀтихал саквалĕгыт. Акв порат

кўщаянув мĀ-вōй нōхвинэ компаният ёт акв программа щирыл рўпитасыт. Тōнт мĀн лильпи техникал майлавесүв, ань нĕматырыл воссыг ат тĀставĕв. Вōраян, хўл алыщлан хōтпат сĀвсыр тының техника ёвтĕгыт, тыг вōраяңкве ке ёхтĕгыт, мĀн пĕс «Бураныл» юил ат ёхтыянув. ТĀн ань сĀвсыр пĕлп снегоходыл яласĕгыт, мĀн тамле утыт ёвтуңкве олн ат бōныщĕв.

– **МĀ-вит ўргалан мĀ тыт овтнэ Вогулка я намыл пинвес?**

– Сōль, заказникт Вогулка я овты, ўргалан мĀв өс тох намаявес. Я йңкылманыл овты, витэ пĀңкың. Ос я сака мил Āти, нĀиңхĀпыт ат яласĕгыт. Таквсы витэ щар мĀниг ёмты, тōнт инспектор-хōтпанув ХĀльўсныл рўпитан колув мус 8 щĕс ос тыил сĀвнув минĕгыт, тōва мĀт хĀпаныл нас хартыяныл, тув мус я тōсамыг ёмты.

– **Пёс порат ты мĀт сосса мэхум блыс?**

– Сосса мэхум тыт блыс, тĀн пĀвланыл хōт ўнлысыт, мĀн ёмашакв вĀглув. ТĀн ялпың мĀнаныл өс ўргалыянув. Пĕс порат тыт пĕс Тутлейм пĀвил ўнлыс. Колхозыт

вĀрнэ порат сĀв мĀн пĀвилквет өлнэ мирыт ХĀльўсн ос мōт пĀвилыт вĀнтлуптавĕсыт. «Вогулка» рўпитаңкве хунь бвылтахтас, тыт акв щĕмья вōраим, хўл алыщлым туп блыс. ТĀн палтаныл нĕмхотьют ат новхатас. Ётыл 2014 тĀлт заказник нĕпаканув мōт щирыл хасвĕсыт, та пĀсныл тыт вōраяңкве, хўл алыщлаңкве, пил вĀтуңкве, лĀхсыт атуңкве ат рōви. Та порат та щĕмья Āтимыг ёмтыс.

ХĀльўсн ос мōт мĀн вĀнтлам сосса мэхум ялпың мĀнаныл ат ёрувлыяныл. Акв тĀл тĀн пуссын акваг-атхатыгласыт, мĀн тĀнаныл тув тотыгласанүв. Ты вĀрмаль урыл учĕный нĕ Любовь Васильевна Кашлатова сĀвнув вĀг, тав мĀхманэ тув ялуңкве атыгласанэ. Ань сосса мĀхмыт ялпың мĀнанылн пўрлахтуңкве ялуңкве ке кĀсащĕгыт, мĀн тув тотыглаңкве вĕрмиянув.

Ам Игорь Александрович потре мĀгсыл яныг пўмащипа лĀвĕгум. Тав Āтятэ ёт мĀ-вит ўргалым мĀн тыгыл яласас. Ос хунь яныгмас «Вогулка» заказникт такви рўпитаңкве патыс, ань Āтятэ вĀрум рўпататэ элаль тотытэ.

Людмила ТЕТКИНА

Степан Чумпин наме янытлан вәрмалъ

Эрнэ яныг вәрмалъ вәрыглам хөтпат наманыл мә янытыл өлнэ мәхумн ань тыхотал мус янытлым бньщавет. Төва хөтпа намытыл ұсыт, пәвлыт, нёрыт, ят, мөт матыр мāt намаявёсыт, ос төват наманыл йисыт миннёныл сыс ләщлакв хот-ёрувлахтасыт.

Мәньщи хум Яков Савин 1702 тәл порат Никита Демидовын Карыс нёр хұлтыс, тавён эрнэ тёр-әхвтасыт тот хөнтыс, ты нёр иң Магнитный ос Выйскийг ләваве. Нёр хұлтуме мәгыс хум номсас эрың матыр олн лөмтыл миве, әти, ты пентсыл тав колтәглэ ёт Тагил мәныл хот-нәвлувес. Тамленёттәл ос люль вәрмалъ мәньщи хөтпа ёт пёс порат өлыс.

Мөт мәньщи хум, Степан Чумпин, хұлтум вәрмалә мощ сөтыңнувег өлум. Ты вбраяң хум 1735 тәл порат магнит-әхвтас тиснэ Сергей Ярцов хум пәлт ёхтыс ос тавён Кушва-ят хөнтум әхвтасанэ тотыс, ләвыс, тот тамле ут хот-әти сака сәв поварәлы. Сөль, ётылнув ляпа нёрыт сусвёсыт, сака яныг месторождения хөнтвес. Та тәлыт тув Екатеринбург үсныл завод тәлат щирыл пуңкотнэ кұщай Василий Татищев ёхталас, ты мә Благодать намыл пиныстә.

Степан Чумпин эрнэ тёр-әхвасың мә хұлтме мәгыс 4,70 солковил мүйлуптавес, титыт тәлт, 1736 тәлт, тав Екатеринбург үсн вөвиньтәлвес, тот иң хус солковил майвес. Ётыл, 1826 тәл порат Благодать нёр пуңк тальхыт тав наме номнэ ос янытлан мәгыс хум тёр памятникыл тўщтвес, тот тамле ләтңыт хансым

өлэгыт «Вогул Степан Чумпин тыт 1730 тәлт нәин шаритавес».

Ты ләтңыт ловиньтым тәра тамле номт ёхты: хум 1735 тәлыт эрнэ тёр-әхвтасыт хұлтыс те, хомус ты элы-пәлт тав нәин шаритавес? Насати ты урыл 1986 тәлт акв пёс потыр хосыт Е. Пермяк «Быль-небыль про железную руду» нәпак хансыс, тот та урыл хансым өлыс, аквтоп хум такви мәньщи хөтпанән ялпың мāt рушитн хұлтме мәгыс тох алвес.

Титыт пёс потыр ос та урыл өлыс, аквтоп Степан Чумпин Демидов вәңын хумиянән алвес. Потыртаве, хунь тав әхвтасанэ Сергей Ярцовын суссылтасанэ, таи Хрущев пуңкотнэ хумын нәпак хансуңкве Екатеринбург



Мәньщи хум номнэ мәгыс памятник вәрвес

ұсын молях тётвес, әлыми төнт ты мāt тән завод ұнттуңкве тах патәг. Ты торыг Екатеринбургын Никита Демидов тав пыге ос тамле нәпак хансуңкве ёхтыгпас... Насати мәньщи хум тавён ты мә өс хұлтыстә. Ты хосыт руц хөтпат тәнти халанынт нур тотуңкве патсыт.

Хотьют вәг, эрың Демидовыт кантаныл сака яныгы өлыс...

Тох манос мөт щирыл вәрмалит өлсыт, туп мәньщи хум хұлтум мāt сака сәв руда-әхвтас хөнтвес, яныг завод капай вәрвес. Татищев төнт ләвхатас Чумпин өйкан кәсың этпос олн ойтуңкве, туп ты ләтңыт нас ләтңыг тохи хулытсыт, нәматыр өлныл өйка воссыг ат ойтыгләлвес.

Ты пёс вәрмалигт таи ёмасыг өлы, Яков Савин ос Степан Чумпин намагөн тыхотал мус номылатыгләләвөг, вәвөг. Ты хосыт тәра-патхаты, пёс пораныл мәньщи мир тёр-әхвтас ёт рүпитаңкве хәсыс, рудный ос кузнечный тәла ёмашакв вәстә.



Пёс хурит Благодать нёр пёслым өлы

Светлана САДОМИНА

www.khanty-yasang.ru

Пилсам Эква (мәньщи мөйт)

Кит хумыг өлсбиг, акв хум нэ өньщас, мөт хум нэ тәл. Вөрн пил ватуңкве минаясыт.

Хөтал ләщалакв унтуңкв патыс, тәң ювле минмыгтасыт. Ёмсыт, ёмсыт, сунсэгыт, посым пайтахты. Ләгланыл щар щама пөльвёсыт. Кол пөхан ёхтысыт, Пилсам Эква ләви:

– Шалтэн, шалтэн, манрыг лөблиина.

Юв щалтсыт, Пилсам Эква ләңын пүт пайты. Пүтэ ты астыс, ләви:

– Исмит тәңкве унтэн.

Акв хум ләви:

– Хумус мән тәңкве патэв, наң акв пуңкв пайтэгыт, мән ат төвләвөв.

– Унтэн, пуссын төвләвөв.

Хумыг унтсыг, Пилсам Эква ләңын исмит хунуңкв патыс, та хуны, та хуны, хумииг унлэг, сунсэг.

Тэсыт, юв щөпитахтуңкве патсыт. Акв хум Пилсам Эква щөпна пувтмәстэ, юв минаясыт. Ёхтысыт, Пилсам Эква урыл щар хот-ёрувләстэ, та поварәлы, та поварәлы. Я-а, номылмәстэ: «Ам май, Пилсам Эква ёт-вуйлыслум, эрың ояс».

Кәтэ щөпена пувтмыстэ кос, Пилсам Эква атим, акв вит хультыс. Пилсам Эква мөйтэ ташир та холас.

Экваг-өйкаг өлэг, кит әги өньщөг. Яныг әги – өйка агитэ. Яныг әги ләвыл йийвес, ат эрупта-вес, акваг лөкамтавес. Экваг-өйкаг номсэг, тавөн кол элнува унттункве эри, вос таккөт өлы. Ойка кол унттыс, агитэ тув вәнтлуптастэ. Олы, өлы, уральтытэ.

Нэтэ ләви:

– Әгин тәнүтыл тотэлн, хул пуңкыт, лорахит.

Тав тәлттысанэ, суныл та хартыянэ. Ёхтыс, колн щалтыс, колт сәмылүй, выгыруй, хантәл лөңкв атим. Сохрипт та нөвыль, унсясыт сул хурипат. Ләви:

– Әгикве, наңын тәнүтыл тотыслум.

Әги ләви:

– Тэм хул, лорахиянын нәнки тәен, пуңканын нәнки тәен.

Ойка ләви:



Савалап әгирищ (мәньщи мөйт)



– Наң тасәвит нөвыль өньщөгын, маен.

– Вуен, мансәвит сунын тәлттуңкве вөрмө-гын, хартэн.

Тав юв та харты. Ёхтыс, нэтэ китыглахты:

– Хөт висын?

– Әгимн майвөсум.

Та порат нэтэ номтэн ёхтүвес, ләви:

– Ам әгим өс колыл янас унттәлн. Эрың тав өс щөлыңыг өлуңкве паты.

Ойка кол унттыс, нэ агитэ тув вәнтлуптастэ. Олсыг, өлсбиг. Ойка минаяс, уральтаңкв. Агитэ тәтәл унлы, ләви:

– Әщ, тәнүт тотэн, ам ты порсэгум.

Юв минаяс, ләвыс:

– Вөиң хул әгин вөви, тәтәл өлы.

Нэтэ ләви:

– Пөрыл, мәйтыл тотәлн.

Әгитэн нәмәтыр нөвыль ат өньщи. Сәмылүйил, выгыруйил ат тотаве, тәтәл унлы. Акв щөс ёхтысыг, агитэн кол әвитэ пәлыг, әви хәпт пуңк хопаритэ унлы. Тэн та лөньщөг. Эква ләви:

– Наң әгин палт минаяс-мөн. Тав хумус өлы.

Тув ёхтысыг, щалтсыг, сәмылүй, выгыруй хантәл акв лөңкв атим. Тэн потыртасыг. Әги ювле ләви:

– Әнум лөньсаң тыттыслына, өньщислына, минән аквпалн.

Мисхумитэ ләви:

– Тотэгыт, маёгын.

Ты мус өлэг, ты мус щунөг.

Наталья Тасманова

Мәньщи мәт йильпи суссылтап вәрвес

Югорск үс
ляпат
блнэ музейт
сунсыглахтын
нётнэ мә щёпи-
тавес, тув ёхта-
лан мәхум
мәгыс «Сохра-
няя прошлое,
смотрим в
будущее!»
нампа выставка
рүпитаңкве
өвылтахтас.



Агирищквет сунсыглахтэгыт



Л.П. Волкова

Ань тув атым савсыр пормасыт XV-XVI нотыт вәримат, ты тулят ос савсыр хорамыт Югорск үст блнэ хум Геннадий Григорьевич Духанов тав хонтсанэ. Тонт 1985 тәлт Югорск үсныл (та порат Комсомольский павлыг лаввес) 21 вёрыстат Эсс я ватат ты тулят хум хонтсанэ.

Тананыл археологытын мисанэ, учёныит ёмщакв сунсыгласаныл, ханищтасаныл ос ювле

мән мәвн история ос этнография Музейн мүйлуптасаныл. Ань ты суссылтап «Эсский перстень - больше, чем легенда» намтсаныл. Ты коныпал мәньщи мир кәнашит оныщум пормасыт суссылтавет, ты лахрыт, тёнтыт, сыраит ос мот савсыр пормасыт блэгыт.

Пуссын ты суссылтапыт щёпитан мәгыс «Музейная инициатива» акв некоммерческий организация 2023 тәлт

1 млн 500 сөтыра солкови грант-олныл майвес, тән ты олнытыл тысәвит ёмас рүпата вәрсыт. Ань ханищтахтын няврамыт, яныгхотпат ты суссылтапын тотыглавет, потыртавет, төват хурит пöслуңкве кәсащөгыт.

Ос 2022 тәлт музейт рүпитан мәхум каснэ мән нэпаканыл майлысаныл, тот «Культура» национальный проект щырыл тән 9,8 млн солковил тәстувёсыт. Ты олнытыл

пормас пиннэ кумыска нормат, йильпи ищхыпың утыт ёвтсыт, тәкыщ постын нәитыл ос сәв мот эрнутыл вәрвёсыт. Овыл ёхтум мәхум хот-щәтгтыт, музей татем нётнэг та вәрим, няврамыт тот пүмщалахтым ёмыгтасыт, хурит пöслысыт ос ёнгалтавёсыт.

Надежда Костылева,
музейт рүпитан нэ,
тётум потыр
мәньщи ләтңыл

Галина КОНДИНА
хансыстэ



Югорск ос Советский үсыгт блнэ савсыр мырыт ты ялпың хөталн вөвыглавёсыт. Тәнки

Нянь янытлан хөтал олыс

**«Сүевәт пәвыл» нампа мәньщи музейт
нянь янытлан хөтал сүкыр этпос 16
числат вәрыглавес.**

вәрум нянил мәньщит, хантыт, башкирыт, хатанит, марийцыт ос киргизыт ялпың хөталн ёхталам мәхум тыттысаныл.

Югорск үст блнэ мәньщи нэ Дарья Ивановна Белова, такви апыгрищаге ёт лям ос сүйпил ёт вәрим нянь тув тотыс. Надежда Борисовна Костылева ос ханты нянь вәрыс. Дарья Ивановна мәньщи щәил

мүйлын мәхум айтсанэ. Тав сөс ос сосыг лүпта щәин тартыс. Тамле щәй мәхумн сака мұстыс.

Аквта порат тот «Молодежь Югры в движении» нампа фестиваль олыс, тот няврамыт савсыр мырыт йикваныл йиквсыт. Тамле ёмас тәла «Движение первых» организацият рүпитан мәхум вәрыгласыт.

Нянь янытлан хөтал ты музейт 2022 тәлт овыл щёс щёпитәлвес. Тонт Белоярский район Касум пәвылныл ханты хөтпат тув ёхталасыт ос нянь вәрнэ күр Сүевәт пәвыл мәгыс вәрсыт, кәсащан мәхум ос ханищтасаныл. Та порат музейт рүпитан хөтпат тамле нянь янытлан хөтал вәрыглаңкве номылматасыт.

Ульяна Белова
потре мәньщи ләтңыл
Людмила ТЕТКИНА
хансыстэ